

*Putanowicz Jos. Aloy. Corona institutae sacra laurea  
Theologica.*

PANEG. et VITAE  
Polon. Fol.  
№ 1344.



P

R

S

I

P

P

S

S

I

S

S

S

S

S

S

S

S

S



# CORONA JUSTITIÆ

## SACRA LAUREA THEOLOGICA

Post consummatum meritorum in Statione Academica cursum,  
Virtuti & Sapientiæ

*PER ILLUSTRIS CLARISSIMIS Admodum REVERENDI DOMINI*

D. M. CASIMIRI  
STEPLOWSKI,

Sacræ Theologiæ LICENTIATI. ejusdemq; & Cursûs Speculativi PROFESSORIS, Collegæ Majoris, Ecclesiarum Collegiæ S. FLORIANI Cle-  
pardiæ ad Cracoviam CUSTODIS, Parochialis S. JACOBI Casimiriæ PRÆ-  
POSITI Ordinandorum & Approbandorum Synodalis EXAMINATORIS,  
Seminarii Academico-Diœcesani PRÆFECTI, ejusdemq; ac Scholarum Vla-  
dislaviano-Novodvorscianarum PROVVISORIS.

*dum à*

*PER ILLUSTRIS REVERENDISSIMO DOMINO*

D. M. ADALBERTO  
GRZYMAŁA,

Sacræ Theologiæ DOCTORE & PROFESSORE, ejusdemq; Sacræ Facultatis  
DECANO, Collega Majore, Ecclesiarum Cathedralis Cracoviensis CANO-  
NICO, Collegiæ SS. OO. PRÆPOSITO, Contubernii Geloniani  
PROVISORE,

## SACRÆ THEOLOGIÆ DOCTOR

*Præsente Amplissimo Magnorum Hospitum Confessu*

In Peraugusto CC. DD. Theologorum Archi-Lycæo.  
*ritu solenni renuntiaretur;*

## REPOSITA,

*Vestigali verò Clientalis svadæ applausu,*

M. JOSEPHI ALOYSII PUTANOWICZ

Philosophiæ Doctoris, ejusdemq; & Matheseos, ac Scholæ Dialecticæ Professoris, Col-  
legii Novodvorsiani Præsidis, S. R. Majestatis Secretarii, Privilegiati Mathematici,  
Regii & Jurati Geometræ, Scholæ B. V. Mariæ Senioris.

## ADORATA.

*Annò Domini 1759. Die verò 26 Mensis Novembris.*

CRACOVIAE In Typographia Seminarii Episcopalis Academici.





Ei autem qui operatur merces imputatur, non secundum gratiam, sed secundum debitum. *Roman. 4. 10*

Corona est res pretiosa ex parte materiae, & est res pretiosa ex parte formae, & est aeternitatis significativa ex parte figurae *S. Bonaventura T. 9. Diet. c. 2.*

Iustitia est perpetua & constans voluntas jus suum unicuique tribuens *S. Thomas 2. 2. q. 58.*

Ad magna praemia perveniri non potest, nisi per magnos labores; si delectat mentem magnitudo praemiorum, non deterreat certamen laborum. *S. Greg. Hom. 37. super Evang.*




22133-  
III





# CORONA JUSTITIÆ



On finè arcano Numinis consilio, ita  
optimè ut mea fert opinio, gloriæ ho-  
noriq; Tuo provisum esse existimo  
PERILLUSTRIS CLARISSIME &  
ADMODUM REVERENDE DO-  
MINE NEO-DOCTOR; quòd non  
priùs sublimem Doctoralis in Sacra  
Facultate eminentiæ adires dignitatem: quin simulac ex  
æquo debita maximis tuis laboribus, sudoribus libera-  
liter profusis, consumatæ Sapientiæ perfectioni, omni  
deniq; numero absolutæ virtuti JUSTITIÆ CORONA  
deferretur. Equidem ut Theologica isthæc Laurea do-  
ctam tuam jam dudum ornasset frontem, id nedum univer-  
si Ordines Academici sicuti meritissimo de Re Literaria  
PATRI studiosissimè peroptabant; verùm etiam Phæbo  
Mufisq; Jagellonicis dicata Juventus Nobilissima, quò



Sacri accessionem Honoris ocyus fuisset congratulata;  
protractam hætenus moram ægrè molestèq; ferebat:  
gaudemus nunc singuli incredibiliquè lætitia perfun-  
dimur, plurimumquè ut debemus, & Tibi Doctoralem  
Theologicum Honorem, & Sacræ Laureæ Te Sapien-  
tissimum æquè ac Dignissimum DOCTOREM quâ ore,  
quâ corde, quâ animo gratulamur. Pridem profectò  
deservita hæcce per octo prope in Statione Academica  
lustra Tibi meritisq; tuis certè amplissimis merces debe-  
batur, quam providum Numen eòusq; est remoratum;  
ut tantò majorem dulcedinem voluptatemve de præ-  
mio perciperes, quantò acerbiores in laboribus dolores  
algoresq; pertuleras. Ita hercle fieri comperimus, quòd  
cùm nusquam omnino æqua desint suæ præmia virtuti,  
ita dilata non minuantur, sed ad majorem gloriæ crescant  
provehanturquè gradum. Sanè ipsa nascentis Mundi ab  
origine isthanc rebus mortalium dixit legem natura; ut  
quantò diuturnior dignitatis expectatio, præstolantia ho-  
minum desideria longiùs suspendit, dum ipso eventu post  
superata tædia virtus emerita coronatur, tantò proli-  
xiori gaudio retardatæ spes hominum abundant. Qua  
igitur vel tacita lætitiae dulcedine mentem tuam perfun-  
di non expediat? quanquam animus tuus sapiens semper  
in se ipso repositus, nec sitienter quidquam expectans  
ardere desiderio, nec alacritate futili gestiens delique-  
scere aliquando est visus, ubi tot exantlatis laboribùs  
parta, tot copiosò & crebrò sudorum profluvio sæcunda-  
ta, tot periculis vitæ quæsita Sacra Laurea, eruditam tu-  
am virtutem coronat, & amplissimis promeritis, cum  
communi Orbis Literarii applausu Theologicus honor  
pulcherrima gloriæ stipendia defert. Quis verò est, qui  
non hodie tantam Tibi tanto Viro gratuletur fortu-  
nam? nisi fortè livore tabescens, probitatem & erudi-  
tionem



tionem tuam eòusquè provec̃tam esse invideat; quis non inter festivas Summorum hominum & Reipublicæ Literariæ congratulationes, honori tuo studiosissimè applaudere contendat? cùm vel omnibus tacentibùs publica meritorum tuorum fama vocalissima audiat: & laudatissimæ actiones, communi Ecclesiæ & Academiae emolumento donatæ, ita Nomen Tuum deprædicent, ut vectigalem Oratorum svadam non multùm exigere videantur. Habes præstò tot magnarum tuarum dorum aestimatores, quotquot eruditi animi tui nobilitatem notam sibi perspectamquè habent, tot virtutum tuarum vocalissimi non desunt præcones, quotquot Viri auctoritate summi, gloriâ non vulgari sapientiæ clarissimi, incredibile illud ingenii tui robur atquè vastissimam mentis capacitatem admirantur. Novimus verò bellè singuli quantum incomparabili sapientiâ, quantum rerum agendarum ratione & usu valeas: quantus sis, seu in Cathedris Doctor, seu in Rostris Ecclesiastes, ex peculiari omnium approbatione, maxima Universitatis gloria, ingenti Ecclesiæ emolumento satis superquè satis didicimus. Quocirca quis in Te isthanc Divinam quâ polles mentem omni laudis prædicatione non ornet? aut æternis monumentis non condecoret? quis illustri non efferat præconiò nobilissimam Tuam virtutem? quis amplissima promerita, etiamsi integrum Eloquentiæ robur enervetur, non quàm altissima voce concelebret? præsertim cum facer isthic Tuus Theologicus honos, nequè duntaxat in præmium exantlatorum Tibi obveniat laborum, verùm insuper in pignus sublimiorum, quæ Te avidissimè expetunt, dignitatum deferatur. Quinimo si in illa incidissemus sæcula quibùs eruditæ virtuti nedum laudis elogium, sed Altaria quoquè Pyramides & Statuæ decernebantur, perpetuum honori Tuo monumentum erigendum



dum esset, excitandi aurei Obelisci, Nomenquè tuum immortalibus cedris & marmoribus insculpi deberet; ut limatissimæ eruditioni & probatæ morum integritati Tuæ par accederet ornamentum. Sed quorsum isthæc? cùm Virtus Tua ipsa sibi sit cedrus, statua & obeliscus; imò verò statuas demolitur vetustas, obscurat oblivio, negligit carpitquè posteritas: at eruditionis Tuæ gloria, vetustate temporum non consumetur, oblivione sæculorum non delebitur, totaquè posteritate integra atquè illæsa perennabit. Quamobrem non petam aliunde ornamenta, virtus Tua ipsa mihi laus erit & materia laudis, tuis te pingam lineamentis, ab arte vel ingenio minimè colores quæsiturus: satis erit meo judiciò, ad subsequendum admirationem ætatum, quod nuda quidem & exigua, sed vera & simplex de Te Oratio proponet. Laborent hoc defectu rudes lapilli, quibus congenitum natura nitorem dene-gavit, ut ab artificis manu fictam gratiam, & emendatum splendorem expectent: at verò nobiles roris cælestis partus gemmæ, quas suo ipsa rerum natura parens fecit radiare candore, proprio commendantur pretiò, nequè mendacem elegantiam ab ingeniosa artis opera præstolantur. Non dispari methodò fulgentissimus ille animi tui politissimi splendor, quidnam candoris ab atra sæpia, quid dignitatis ab oratione desiderat? qui tanta claritate refulget, ut potius lumina Oratorum extingvat, quàm tenuissimum ab iis radium sibi accessum iri desideret. Itaquè Superos testes appello! nihil veritatem adulationis, nihil sermonem cerussæ, nihil verba superlationis habitura; nam nequè assentatorem apud Virum prudentissimum, nequè mendacem apud hominem rectissimum, me fore aut decet aut convenit. Nihil ergo penitus fingam, nihil à vero alienum in medium adferam,

cum



cum non aurium titillationem, sed sermonis simplicitatem, non assentationem, sed integritatem sine simulatione Tibi ut Viro Sapientissimo probari placereve haud ignorem, Hæc erit summa laudum Tuarum PERILLUSTRIS DOMINE NEO-DOCTOR ut cum Tibi Sacram Doctoralem Theologicam Lauream officiosissimo applaudens calamô congratulor: eandem ut JUSTITIÆ CORONAM consumatæ Tuæ Virtuti & eruditioni repositam, pura & simplici Oratione ostendam.

**H**abet hoc in se augustus honos, ut cum occulta quadam & insuperabili potentiâ corda & animos ad se pelliciat humanos, ita ut ne unum quidem adeò corrupti sensûs facilè reperiās, cujus tamen aureum gloriæ condimentum non acuat famem; nihilominus operosæ duntaxat Virtuti in alimentum cedat, Dijs & hominibus exosam ignaviæ ambitionem rarissimô exemplô coronet. Quid sunt amabò Sceptra & Coronæ, fasces & purpuræ, magnifica hercle honorum insignia? si non deservita promeritorum merces? debitum honesti laboris stipendium? quod non aliter nisi ut bene merentium panem competitoribus suis distributiva Orbis gratia deferre solet. Quippe si rectam sæculi sequamur mentem, jamdudum æquitatis persvasit ratio, honorem inter & meritum omnimodam proportionem servari, solamquè inclytam virtutem gloriâ & præmiis atque splendore decorandam. Sola inquam virtus dignitati mensuram ponit, quæ quantò altiùs assurgit, tantò sublimiora eminentiæ fastigia petit. Enimverò si ad alia præterquam meritorum attendatur suffragia; collatus ignavis honos, nec tantillùm ad veram gloriam suffragii feret; non enim quidpiam est aliud dignitas in indigno, nisi



ornamentum in luto. Rubet ad infamiam, non ad de-  
corem splendet, velut cancer in murice qui non dire-  
cto dignarum Principe virtutum gressu, sed retrogrado  
ambitionis, fastûs, vel eminendi libidinis, ad purpuram  
pervenerat passus: non quiescit securè in Senatoria Cu-  
ruli personatus Consul, qui non præmissis laborum seniô,  
præmaturè dignitariam isthanc occupaverat sedem.  
Merita ad fasces viam præscribunt, nunquam splendi-  
dius ad honoris Capitolium itur, quàm cui per gloriosa  
gesta panditur porta triumphalis. Arcitissimus sit omni-  
no dignitatis cum virtute nexus, quò melius & suus  
dignitati accedat splendor, & justum præmium defe-  
ratur probitati; ita virtuti honos, honoriqùè respon-  
deat virtus, ut reciproco utrumquè decore augeatur.  
Ita porro; nunquam Dii magna præmia facile conces-  
serunt, sed cum omnia laboribus vendant, pulcherri-  
ma præ primis ornamenta honoris, nonnisi gloriosis acti-  
onibus, & consumatis promeritis deferre consueverunt.  
Præmittenda erat Coronæ galea, antequam Victor Or-  
bis Macedo universis gentibus dixisset legem, non una  
bibit spongiâ sudorem, priusquam tegeret laurô tem-  
pora Cæsar, post exesas acetô Alpes, nunc primùm  
Annibali triumphales Latii portæ patuerunt. Fortem  
nonnisi Athletam Mavortia palma Victorem esse osten-  
dit, sudores bellicos Civica ferta designant, palmare  
emensum iter delatum decertanti in Olympiis braviū  
testatur. Currentibus & navigantibus, certantibus &  
vincentibus, non mollibus & ignavis æquo Romanorum  
judiciô victrices distribuebantur Coronæ, indomitæ  
Magnorum Heroum fortitudini, non turpi effæminatæ  
indolis inertiae solennes decernebantur triumphi, nec  
Imperii deferebantur sceptrâ, nisi manibus ferrô fati-  
gatis



de-  
dire-  
rado  
ram  
Cu-  
eniô,  
dem.  
endi-  
rioria  
nni-  
suus  
defe-  
pon-  
eatur.  
nces-  
herri-  
acti-  
erunt.  
r Or-  
nuna  
tem-  
mum  
ortem  
osten-  
mare  
vium  
us &  
orum  
omitæ  
inata  
i, nec  
o fati-  
atis

gatis. Non enim competit Corona nisi capiti quod  
sudavit & alsit, non decet triumphus, nisi probatam  
inter bellorum æstus & flammæ Gradivi virtutem,  
non ornant fasces dexteram, nisi quæ pro communi  
Civium decertavit salute: secus vilescit apex, qui non  
pretiô meritorum emitur, & indignum honore præmi-  
ari, idem est; quod coronari cucurbitam, vel in sti-  
pitem sceptrum conferri.

Perpexisti id optimè PERILLUSTRIS DOMINE  
NEO-DOCTOR, ut immortalis Nominis Tui gloriæ  
maturè prospiceres, quocirca dum Laureatum Theo-  
logici honoris nunc bravium tenes, non aliâ nisi tutissi-  
mâ virtutis semitâ, quam Graves trivere Patres ad illud  
voluisti contendere; præmisisti merita hercle maxima,  
priusquàm erudito Capiti Tuo Sacra Cydaris tota Gen-  
te plaudente Academica deferretur; emensus es pal-  
mari passu cuncta laborum Academicorum Olympia;  
ut post consummatum sudorum & curarum cursum, sub  
umbra Theologicæ Laureæ, ex æquo coronatus DO-  
CTOR placidissimè conquiesceres. Quò verò lauda-  
tissimarum Tui actionum gloriosiores forent progressus,  
primis statim ab annis sollicitè & graviter est Tibi la-  
boratum, nequè cursum ætatis in festinatione virtutis  
expectaveras. In id omnem contulisti operam; ut præ-  
textam indutus, iudicio & ingenio cum Viris decer-  
tans annos etiam ad gloriam palmam præferres. Opti-  
ma quippe indoles primis statim proditur cunîs, nescit  
sub ipsis gloria fasciis latere, atquè futuræ semina vir-  
tutis infans quoquè ultro ostendit natura. Primi ab in-  
cunabulis anni ulteriorem vitæ tractum declarant, &  
quantum cuiquè restet odoris in arido, florida demon-  
strat ætas. Habet isthoc speciale generosus animus



privilegium, quòd adhuc ab ubere pendens ad præcla-  
ra contendat facinora, ingentes animæ vix adolescere  
incipiunt, jam adultam Orbis expectationem adimplent.  
Suoapte se nutu produnt egregii naturæ partus, na-  
scitur statim in purpura, quæ humanos delectet ocu-  
los rosa: rubus qui exporrectam expungat dexteram  
aculeatis obarmatus sepibus pululare incipit: tota du-  
ratura æternitate Cedrus ab imis radicibus duro corti-  
ce commendatur. Nimirum pendet tota à vere æstas,  
à flore fructus, ab aurora dies, à fundamentis domus,  
à tenera ætate dextra vel sinistra provectorum anno-  
rum omina dependent. Atquè inde est, quòd aureos  
istos virtutum & scientiarum fructus, quos ad nunc in-  
feracissimo omnigenæ perfectionis vitæ Tuæ autumno  
demiramur, in flore ætatis jam omnes suspicabantur,  
palamquè in adolescentia Tua ad quæquè optima &  
honestæ composita velut in herba ostendisti, quæ in-  
genii maturitas, & quantæ fruges industriæ Tuæ essent  
futuræ. Nam reliqua tempora demetendis aut decerpen-  
dis fructibus sunt accommodata juvenus verò significat,  
num amarum lolium; aut pingves aristas, labruscas aut dul-  
ces uvas ulterius sit ætas latura. Facile verò in dextram  
partem propendere, cum illi cognoscantur adolescen-  
tes, qui se ad claros & sapientes Viros, atquè specta-  
tæ virtutis & probatæ fidei conferant, quibuscum si  
frequentes sint, opinionem afferunt populo, eorum fo-  
re se similes, quos sibi ipsi delegerunt ad imitandum:  
Natura Tua in bonum semper propendens, licèt sua  
sponte sese ad virtutem & honestatem proveheret, il-  
lam tamen optima Sapientissimorum Virorum institu-  
tione, & Literarum cultura, ad opportuna Ecclesiæ &  
Rei Literariæ negotia formari voluisti, à ludis & ludi-



oris puerilibus alienus, indolem egregiam maximorum quorumvis capacem ad seria duntaxat aptabas. Cum vero in ipsis rebus quæ discuntur & cognoscuntur, invitamenta quædam insint, quibus ad discendum cognoscendumve moveamur, hinc evenit; quod animum tuum scientiarum avidum à teneris statim liberalibus studiis & honestissimis artibus imbueres, sicq; rerum cognitione captus adeò Musas adamâris; ut cum maximis curis & laboribus compensares eam, quam ex discendo voluptatem capiebas. Nequè sunt vota tua elusa, nequè toleratæ molestiæ & superata scholastica tædia in cassum abiere; legisti ex ferrea laborum semente auream eruditionis messem, elicti ad æstum adurentis Phæbi sudores in gemmas concrevere, noctium dierumve vigilias, uberrimum ex otio Literario emolumentum, & scientifici profectus usura cumulatissimè rependit.

Atque cum ita pulcherrimos in literarum studio fecisses progressus, quò indoles tua excelsa plus plus ad majora perfectionis accresceret incrementa, Regni Scholæ & Academicis obeundis laboribus libenter Te devovisti. (a) Publicum isthoc Sapientiæ theatrum meritò virtuti tuæ debebatur, ut quæ nusquam latere didicit, ibi illustrissimos Cælo dignarum actionum diffunderet radios, unde in Ecclesiam & singulas Reipublicæ partes non modicum sinceræ eruditionis lumen derivatur. Docta laborum Academicorum aggressus Olympia, Literarium hoc stadium dexterrimus Athleta palmari decurrebas passu, nusquam in itinere cespitare visus, quocunque

C2

(a) Annò Domini 1721. ad primam Lauream promotus stante Decanatu Clarissimi ac Doctissimi Domini M. Michaelis PRUSKI, ad præsens U. J. Doctoris, Universitatis Zamoscensis Patris Senioris.



cunquè maturum fixeras pedem, ubiquè gloriosa eruditæ tuæ virtutis vestigia impressisti. Ludus isthic scientificus à Te integrò bienniò seriò tractatus, consummatum Tibi Liberalibus in Artibus etulit Magisterium, gemmeo sudoris rore Philosophica fœcundata Arena in viridantes succrevit Laureas, quæ erudito Tuo vertici in Doctorem pulcherrima contentione cessere Coronam. (b) Pervenisti ad Laureati bravium Honoris spinosa & aculeata duri laboris viâ, non mollibus rosis respersa semitâ, gnarus bellè; in arduo excelsoquè loco, si omnem; eruditum hercle potissimùm habitare honorem, confragosum huc iter asperumvè esse haud facile superandum. Academicis ornatus titulis, ad quos dignitate ingenii & doctrinæ, non ambitione vel fastu perveneras, dum indefessus & laboriosissimus Professor in Doctorali stetisti Cathedra, quantò superiori laureati Honoris locò eminentior, tantò elevatissimæ sublimitate mentis præstantior es visus. Docta non aliter subintrabas Lycæa, nisi ornatissimo Musarum comitatus apparatu, in quibus quantum admiranda illa vi ingenii posses, quantum arte & doctrina valeres, noverunt omnes, quotquot de plenitudine sapientiæ Tuæ lac eruditionis & dulcem scientiarum pleno ore ambrosiam hauriebant. Literariam quoties eruditum decertaturus certamen tota Pallade armatus descenderas in arenam Philosophus, toties triumphans post confecta prælia Victor recedebas, palamquè ostendisti, non solum Mavortium campum, sed etiam doctam aciem esse Laurearum feracem, quæ æquè Heroicæ dexte-

(b) *Annò Domini 1723. Doctor Philosophiæ & Magister in Artibus Liberalibus creatus, stante Decanatu Perillustri Clarissimi & Admodum Reverendi Domini M. Francisci KALEWSKI exposit Sacræ Theologiæ Doctoris.*



dexteritati ac strenuæ Literatorum virtuti in victrices succrescunt corymbos. Peripatheticam philosophandi sectam professus, institutum sui amplecti haud Tibi placuit, utpote cujus animi singulare oblectamentum erat, libris continuò accumbere, sedatæ lectioni dierum noctiumve redeunte vice, ad Solis labores, & Cleantis invigilare lucernas, ne Te ambulatorium in Statione Academica redderes Professore.

Spectârunt in Te & probârunt isthas nobilissimas animi dotes primi Academiae Patres ipsaque Universitas talem tantumve plurimum sibi est gratulata Virum, qui ut non unam par eras ornare provinciam; ita singula sese offerentia munia, ea alacritate complecteris, quæ studiosissimos boni communis decet amatores: ea dexteritate suscepta perficiebas, quæ optimis Reipublicæ Literariæ Civibus est ingenita. Nulli Tu labori manum quandoquæ subtraxeras, indignum Viro præsertim Academico reputans timere laborem: sed quòcunq; sive vota Patrum obedientem filium vocarent, sive Cathedræ Doctorem invitarent, sive Rostra Sacrumve profanumve Oratorem poposcerent, sive longè latèquæ per amplissimas Poloniae, Lithuaniae, Prussiae Provincias dissipatæ Academiae, Scholæ, Coloniae, quæ laboriosum Colonum, quæ doctissimum Magistrum & Professore ultrò ad se pulcherrima æmulatione pertraherent, ubiquè lætus & alacer non ibas, sed volabas, amore publici commodi alas ministrante. (c) Unanimi Ordinum Academicorum votò Albeni in Lithuania Academiae in dignissimum delectus Directorem, tenera Adolescentum ingenia ad honesti rectiquæ amore

(c) Anno 1724. in Albam Ducalem profectus, integro triennio Directoris illius Coloniae officio est functus.



morem præceptis adhortamentis, exemplis, diligenter formabas, feliciterquè successit isthæc Tibi animorum cultura, ex qua Ecclesiæ & Patriæ aurea Virorum messis adolevit. Arduo Professoris officio ita strenuè es functus; ut duo illa Platonis præcepta adamussim adimpleres: unum; quòd utilitatem conceditæ juventutis sic tuereris; ut omnia quæcunque ageres, suorum etiam oblitus commodorum ad eam referres: alterum; quòd totius semper diligentem gereres curam, nec ita singulos curares, ut reliquos desertuisse videreris. Nosse verò cum optimè; nihil esse fædius Præceptore furioso, qui cum debeat esse mansuetus & humilis ad omnes, è diverso si torvo vultu, trementibus labiis, rugata fronte, effrenatis convitiis, facie inter ruborem palloremve variata, clamore perstrepat, non tam ad bonum trahit, quàm ad malum sua sævitiâ præcipitat: hinc est; quòd nunquam aut tristem austeritatem, aut dissolutam comitatem præferres; sed graviter ad amænitàtem composito vultu, ingenuas juvenum indoles suavissimò amoris imperiò, ad quæquè optima & honesta & invitabas & urgebas. Sic cum Lithuanum Orbem institutionis Tuæ laudatissimæ gloria, summo Matris Universitatis honore & gaudio implevisset, Pruthenæ ornandæ es admotus Provinciæ, ubi amplissimum benè merendi campum invenisti. (d) Egisti inibi nedum laboriosissimum ut assoles Professore, sed acerrimum quoquè Jurium Academicorum Propugnato-rem, neglectam pristinæ dignitati, & primævo flori Culmensẽ restituisti Coloniam, collapsos vindicasti census, prætensam quorundam juris alieni usurpationem

(d) Anno 1727. Culmam pariter in Directorem destinatus biennio illi Aca-  
demie gloriøsè præfuit.



nem fortiter impugnâsti, ingenti Juventutis illarum partium emolumento, & tuo non minori honore, quàm promerito. Si alicubi, hercle hîc potissimùm prudentia Tua in rebus gerendis, & non fucata eruditio in docendo eminuit, quâ subjectos regebas juvenes, quâ scholasticas stabiliebas leges, quâ castigabas improbos, quâ tuebaris bonos, quâ laudabas diligentes artium honestarum Cultores, quâ præcepta laudis & salutis aptè ad persvadendum teneris imprimebas ingeniis, quâ hortabaris ad decus, revocabas à flagitio, quâ facta & laudabilia proborum studiosorum opera, cum ignavorum ignominia conferendo, laudis prædicatione & præmio afficiebas. Viget adusquè gratissima tua in illis partibus memoria, hæret in eorum animis dulcis Nominis tui recordatio, quos perenni Tibi obstrinxeras obligatione: nemo est illorum liberaliter à Te educatus, cui non Tua fidelis institutio, cui non salutaria monita, cui non locus ille mutus, qui pulcherri-  
ma tua resonabat eruditione, cum grata commemoratione in mente versetur.

Non hîc tamen terminalis tuorum meritorum meta, parva isthæc erat Virtuti tuæ Provincia, trajecto feliciter Vistula, ad Varthæ temet contulisti fluentia, majorem gloriæ tuæ quæsiturus locum, in Polonia stetitisti Majori. (e) Ea est profectò virtutis natura; ut locorum nunquam limitetur angustiis, nec Herculeas pro obice habeat columnas, sed ubi famâ dignitatis suæ omne spatium impleverit, novam honori suo, etiam ultra Mundum Coloniam inquirat. Quid enim gloria virtutis comes? si non pervagata multorum & magnorum

D2

rum

(e) ab Anno 1729. usq; ad Annum 1734. Seminarii Posnaniensis Præfatus Theologiam profitebatur.



rum Virorum, vel in suos Cives, vel in Patriam, vel in omne genus hominum fama meritorum? volat isthæc per singulas Orbis regiones, ex una in aliam oram velocissimo defertur cursu, ut ubiquè gentium & terrarum vocalissima audiatur. Sic & Nominis Tui celebritas, per Culmenses resonans montes, vicinæ quoque Majoricæ laudabilem invidiam peperit, invidia æmulationem, æmulatio Tui desiderium accendit, quod non aliter restringi potuit, nisi integro Sapientiæ Tuæ profundò. Quo cum gaudio, quo cum jubilo Dioecesanum Cleri Posnaniensis Seminarium dignissimum suum Te consalutavit PRÆFECTUM, quis satis cumulatè exprimere valeat? qui quantò majori omnium expetebaris votò, tantò amplius prolixiori lætitiâ tædiosas singulorum expectationes coronasti. Honorificam istiusmodi non minùs tamen onerosam amplexus spartam, quid non egisti? quantos non tulisti labores? quantas non suscepisti curas? quantas non vigilias impendisti? ut idonea obeundis Ecclesiæ muniis substitueres subjecta, ut ad usus Sacros aptos formares Viros, ut exercitatissimum Aris, Paræciis, Stallis Clerum provideres: norunt optimè Ecclesiæ, loquuntur Cathedræ, ipsiquè Templorum parietes declamant. Testes verò sunt laborum tuorum maximorum illi favores Summorum in Majori Polonia Virorum, Primorumq; hujus Provinciæ Procerum, quorum corda, magnetica quadam virtute in Tui pertraxisti amorem, apud quos æstimationem & plausum hercle non vulgarem promeruisti. Notum omnibus quo loco apud ILLUSTRIS-SIMUM EXCELLENTISSIMUM & REVERENDISSIMUM DOMINUM JOANNEM TARŁO, EPISCOPUM POSNANIENSEM positus fueris, quantùm

Ille



Ille primæ authoritatis Senator nobilissimas Tui animi  
dotes adamârit, qua te singulari benevolentia profe-  
queretur, quantusve eruditæ tuæ virtutis fuerit enco-  
miastes & laudator. Ist hæc verò præcipua specialis  
benevolentia tanti Viri documenta, non cæco fortu-  
næ respectu aut blanda assentationis ( quod usuvenisse  
comperimus ) circumventionem lucratus es, sed labo-  
ribus merita, meritis virtutes, virtutibus *Illustrissimi An-*  
*tistitis* gratiam comparasti, industriâ auxisti, innocen-  
tiâ ornasti, animi robore, multis magnisque pro Eccle-  
siæ bono susceptis curis confirmasti & solidasti. Quid  
verò dicam de incredibile illa tenerrimi affectus testifi-  
catione ILLUSTRISSIMI & REVERENDISSIMI DO-  
MINI FRANCISCI KAZNOWSKI, EPISCOPI DO-  
MITIOPOLITANI, SUFFRAGANEI & OFFICIALIS  
GENERALIS POSNANIENSIS ? cujus animæ arctissi-  
mo dilectionis vinculo in tantum eras agglutinatus;  
ut Tibi intima præcordiorum pandere non dubitaret:  
ei Tu superstiti à corde fueras carissimus, ejus de-  
mortui Virtutes, Nomen & merita perennibus in-  
scripsisti æternitatis fastis. Insequebaris vectigali  
pennâ palmarem *Gentilitiæ Ejus Soleæ Cursum* (f) illam  
pro scopo terminalem intendens metam, in qua po-  
sthumâ *Amplissimi Præsulis* memoria cæpit perennare.  
Qua verò laudis prædicatione non debeant extol-  
li, Theologicæ, si in paginam venerint disceptatio-  
nes Tuæ? quò non opus sit celebrari elogiò seu  
Sacram, seu profanam Eloquentiam? quæ quoties per-  
suggestus & Rostra insonuit, nunquam sinè publico plau-  
su, & communi approbatione audiebatur: nusquam Tu  
E à docto

(f) *Panegyris in obitum Illustrissimi & Reverendissimi D. Francisci Kazno-  
wski Suffraganei Posnaniensis, luci publicæ donata, Cursus Soleæ inscripta.*



à docto conflictu recessisti sinè victoria Theologus,  
nunquam sinè triumpho descendisti Orator. Ille glo-  
riosissimus ex Theologicis Thesis solennis Disputa-  
tionis Actus, quem in publica *Illustrissimi Posnaniensis Ca-*  
*pituli* facie, in Amplissimo Sapientissimorum Virorum  
confessu, cum maximo Gentis Togatæ expeditivisti ho-  
nore, quam non Tibi existimationem conciliavit? quam  
gloriam non detulit? non modicum hercle isthoc ele-  
vatissimi tui ingenii argumentum, meoque judiciò laus  
neutiquam postrema.

Suffecissent isthæc ad perennem Nominis Tui  
commendationem; justam tamen meritorum tuorum  
nondum adimplerunt mensuram: idem Tibi qui &  
Herculi animus, cui parum erat colubros dirumpere  
sævos, nisi septicipem Hydram, Erymantheos Apros,  
& Symphaleos Alites enecasset, sicque post superata  
laborum pericula, Heroicam sui fortitudinem, lucidissi-  
ma inter sidera Poli, perpetuo lumine fecisset radiare.  
Sic & celeberrima laudatissimorum tuorum promerito-  
rum fama, quæ longè latèquæ amplissimas Lithuanix,  
Prussix, Majorisque Polonix regiones est pervagata,  
virtuti tuæ nequaquam terminum metamque posuit, imò  
verò ad difficiliora tentanda, audendumque; majora cor-  
datissimum accendit pectus. Pulcherrima hæcce laborum  
Corona, quæ cæteris jam aliàs sufficiens ad coronidem  
foret, Tibi ad majores prælusit curas, & ubi plerique pro-  
stratis viribus manum labori subtraxerant, Tu & ani-  
mo & corpore erectus, gravioribus ferendis oneribus  
fortes supposuisti lacertos. Reversus es ubi feliciter ma-  
gna Ordinum Academicorum voluptate, insigni Tua-  
rum expectatione virtutum, Majori è Polonia redux  
in finem Almæ Matris, à quo aliquantum secesseras,  
non



10

non vana facilè quiquè conjecturâ conſequebantur  
qualis, quantusve domi futurus eſſes, cum perſpicua  
qualis foris fuiſſes antea documenta dares.” Et jam  
„ illorum laborum quos graviffimos per tria luſtra in-  
„ deſſus Profeſſor ſuſtinuiſti, primum fructum decer-  
„ pſeras, jam ſcilicet laborem pro labore tanquam  
„ præmium & ſolatium lucratus fueras, jam in hoc  
„ Collegium Philoſophorum quod minus appellatur,  
„ propter minimas reddituum fortunarumquè acceſſio-  
„ nes, more ſolenni Majorum vocatus fueras, (g) jam  
„ hæſeras quaſi ad metam, & in Parnaffo amæniori fueras  
„ collocatus, in conſortiumq; Virorum receptus, è quo-  
„ rum numero cum opus eſt; Clariffimum Collegium  
„ Jurisperitorum, Doctores, Jagelloniana ſparta, Regi-  
„ os Profeſſores, Nobiliſſima Medicorum Familia,  
„ aut Theologorum ſublimis & Auguſta Facultas, ope-  
„ rarios eximios eligit & ſecernit ſibi „ (b) cum ecce  
iterum, velut avis ad volandum, ita Tu laboribus Aca-  
demicis tanquam ipſâ naturâ deſtinatus, ad exploran-  
dam penes Marchionales Aquilas ingenuam Polonæ  
Alitis pullorum indolem, ut aliàs Vir hoc in negotio  
probatiffimus, ſummo Patrum conſenſu delectus es &  
ordinatus. (i) Quanta id munus dexteritate geſſeris,  
non eſt cur multis efferam; ſciunt conſequenter om-  
nes, quibus prudentia Tua in ſedandis fluctuantis ju-  
ventutis motibus, facillima erudiendi methodus, in for-  
mandis teneris animis, atquè maturum utrobiquè judi-  
cium notum ſatis perſpectumquè habetur. Non enim

E2

ut bel-

(g) Anno Domini 1734. redux è Majori Polonia inter Collegas Minores annumeratus

(b) Joannes CYNERSKI in Profeſſore Academico.

(i) ab Anno 1734. ad 1737. Director Academiae Marchionalis Pinczoviensis, trienniū eidem præfuit.



ut bellicosus Heros, atque cruentis Gradivi exercitissimus negotiis, ita Vir eruditione, virtute, & docendi Magisterio clarissimus, commendationem sui à laudantium calamo expectat: sed ut illi reportatae de hoste victoriae; ita huic parti animorum triumpho cumulatissimam elogiorum materiam subministrant. Probat Gubernatorem navis feliciter superata tempestas, Scyllae Charybdesque prudenter evitatae, & servata navigantium salus, artem & diligentiam sui commendant: Tibi MYSZKOVIANARUM Classium circumspectissimo Argonautae, ventosum illud juvenilis ætatis mare pacifice compositum, & deductae fausto fidere ad portum bonæ spei carinae, ut summam gloriam adferunt, ita placidissimam morum malaciam, & prosperum studiorum cursum referunt in acceptis.

Labor tamen labore crescit, & unius rectè administrati ratio, suscipiendi alterius est argumentum; animus tuus tot curis & sudoribus induratus, cum omnia in natura operari advertisset, monstrum esse hominem otiantem judicasti; ac ideo de labore in laborem procedens, sudoribus sudores abstergens, operosis exerceri negotiis continuò voluisti, & æterno Superum consilio tibi collata, ambabus (ut ita dicam) manibus amplectabaris. Purpura Decanalis quæ Principem inter Artistas obtinet locum, ingentibus confectis laboribus, non tamen enerves, urgentibus ultrò Facultatis Philosophicæ suffragiis tuos vestivit lacertos, (k) honor fateor auctoritatis primæ, onus procul dubio maximum, isthoc quantum bajulos sui premat Athlantes! nemo nisi expertus intelligit, quod fortissimarum non nunquam virum

(k) Anno Domini 1737. revocatus ex Academia Marchionali in Decanum Facultatis Philosophicæ concordibus votis electus.



rium Viròs pondere suo depresso & oppressit. In tam sublimi dignitatis constitutus gradu, eò copiosiores fundebas sudores, quos anxia subjectorum Decanali tuo regimini eliciebat sollicitudo, more eorum, qui quantò altiori sedent in balneis loco, tantò abundantius sudant: gemmei tamen frontis Tuæ eruditæ rores, illos Sapientiæ continebant sales, ex quibus ingeniosæ apes dulcia mella colligebant. Inter æstivos Solis ardores purpureus hic pannus, gravis Tibi, minimè verò molestus erat ornatus, quem ferventissimum boni communis alleviabat desiderium, & publica Rei Literariæ commoda curarum æstus suavissimo attemperabant flabellò. Parùm nihilominus erat Te tantis premi oneribus, nisi nova laboris moles, in eruditum tuum devoluta caput, pondus ponderi addidisset, curas accumulasset curis, fortemquè animum nulli cedentem conatui ad graviora ferenda molimina urgeret. Isthæc profectò me hercule præcipua est magnanimorum gloria Virorum, quòd impendentes labores, quos timidæ solent expavescere mentes, insuperabili perferant virtute, & adversus quasvis molestias imperterritum animum obfirmant. Vitreus ille habetur, quem levis curarum frangit attactus: mentem tuam solido adamante conflata, nullo ictu uspiam concussam sub ferrei malleo laboris fortiùs consolidari quis non novit? quem ut onus Decanalis non fregit honoris, ita oblata Cursus Philosophici sparta, Vladislavianum Professore parem & æquè firmum ac solidum est experta. (1) Promptissimò & non cunctantì ut aliàs soles animò, palmarem istiusmodi aggressus Cursum, rectissima veritatis semitâ

F

avidis

(1) Cursum Philosophicum Foundationis Vladislavianæ biennio primùm ex Collegio Minori extradidit.



avidis scientiarum Cultoribus præcurrebas ad metam,  
non per devia & abrupta errando, sed plano & trito  
pateticæ doctrinæ itinere, ad intentum eruditionis ter-  
minum eodem inoffenso pede feliciter deduxisti. Tot  
tantisque exantlato laboribus, tot ingentibus confecto  
curis, æqua operosæ præmiatrix Virtutis, præmiorumve  
dispensatrix Mater Universitas, debitum tandem quod  
hactenus remorata erat stipendium detulit, dum Te  
Majori emeritorum de Re Literaria Virorum Collegio  
associari & voluit & curavit. (m) Nihil hoc in passu  
fortunæ debes; candore enim tuo & per iteratas  
meritorum instantias, non cæca forte, aut instru-  
cta suffragatione quærendum virtuti tuæ præmium exi-  
stimâsti: hoc enim in primo ad Stationem Academi-  
cam ingressu enixè Tibi laboratum est; ut honore pri-  
mum dignus redderere: deinde ut laudabili æstimatio-  
ne omnium floreres: ultimum quod superest, ut eò ma-  
ior Nomini Tuo gloriæ celebritas accederet; si ex col-  
latis honorum titulis, dignitati tuæ testimonium, non  
ambitioni vel fastui gratuitum beneficium deferretur.  
Omnibus quippe chariora sunt sua opéra, quæ summo  
labore confecta sunt, illaque pluri æstimamus, in quo-  
rum assécutione plus meriti impendimus: quæ verò  
sponte & quasi donò fortuna offert, ex illis minus  
gaudium & voluptatem percipi, continuo usu atque  
experientiâ docemur.

Hac operosæ virtutis Appiâ, dum Academici Capito-  
lium subintrâsti honoris, eruditos iterum labores à capite  
repetiisti, non alium horum nisi eundem, quem &  
mortalis vitæ exitum habiturus. Innutritus quippe  
labo-

(m) Annò Domini 1738. gremio Collegii Majoris annumeratus. (o)



laboribus animus tuus, desidia nequaquam consumi  
potuit, grandibus exerceri negotiis assuetus, omne tem-  
poris momentum perditum iri arbitrabaris, quod non  
novo de Re Literaria promerito fecisses memoran-  
dum. Crescant sub calamo laudes Tuæ necesse; ubi ingens  
materiæ elogiorum cumulus accrescit: multiplicentur  
encomia, ubi merita augentur: si tamen tantum Ora-  
tio assurgere valeat, quantum gloriæ tuæ magnitudo  
est provecta. Decanales Philosophici honoris una cum  
Purpura Fasces iterum in manus humerosque devolu-  
ti tuos, (n) eundem Te, quem & ante Atlantem repe-  
rerunt, aliàs fortem, robustum, infractum, pari quoque  
Tu eos gessisti virtute, æquali dexteritate & animo  
tolerasti invictò. Felix illud sceptrum, quod Tonantis  
retinet dextera, felix Cydaris, quæ aurei Parens sæculi  
redimitur Saturnus, felix caduceus, quem Mercurius ge-  
stat, felicior Purpura Decanalis, quæ Te illum ornavit  
Principem, à quo & reciprocus Murici accessit splen-  
dor, & summa in Peripathum est gloria derivata. Non  
tamen isthic Purpuratus honos, auxit in Te superbiæ  
ullam, ac ne levissimam quidem suspicionem, (licet in alto  
positis non altum sapere difficile sit, & omnino inu-  
sitatum, sed quantò inusitatus, tantò gloriosius) verum  
profundam animi excitavit demissionem: non ar-  
rogantiam, sed amænissimam morum gravitatem, non  
rigidum supercilium, sed modestiam & affabilitatem in  
fovendis gratiosè Professoribus confirmavit. Quantum  
felicissimum placidissimumve Tui regimen Genti To-  
gata placuerit, vel exinde ventura discat posteritas;  
quòd cum ambulatorii hi Fasces identidem de manibus

(n) Decanus Artistarum 2do electus ex Collegio Majori.



manus transferantur, eosdem trinis vicibus (o) summo  
 Artistarum desiderio, communibus Facultatis Tibi dela-  
 tos suffragiis, & notabili Stoæ incrementō, & maximo  
 Laureatorum Virorum augmentō ac gloriā, & peren-  
 ni Nominis Tui fama atque memoria Princeps Purpu-  
 ratus gestares. Nequē verō Decanalis isthac sparta  
 adeō Te totum occupaverat, quin simulac integer al-  
 teri superesses; ita Tu in omnes exdividebaris labores, ut  
 singulis non diminuta mente & animo præsentissimus fo-  
 res. Vice secunda, sed & omine studiosarum menti-  
 um secundissimo, Philosophicus Cursus omnibus vasti-  
 or Olympiis tibi obvenerat terendus, (p) descendisti  
 victorioso in arenam Palladis pede, fortis ut olim Athle-  
 ta, nec prius ab erudita recessisti agonia, donec glorio-  
 sum emensus iter, bravium metamque teneres. Quis  
 hic incredibilem illam ingenii tui subtilitatem satis po-  
 terit demirari? quā abstrusa Philosophicarum difficul-  
 tatum attingebas arcana: quis mentis acumen sufficien-  
 ter stupebit? quō intricatissimos felicius quam Macedo-  
 nis gladiō resolvebas nodos, & occurrentes mutuō collu-  
 ctantium opinionum prudentissimè controversias diri-  
 mebas, nihil dubium, obscurum, innodatum; omnia cla-  
 ra & patetica relinquens. Tantīs sudorum tuorum pro-  
 fluvīs Philosophica sæcundata arena, non sterile lolium,  
 sed auream Virorum Tibi germinavit messem, in viri-  
 dantes succrevit Laureas, quas ut felicem manuum tua-  
 rum laborem, in eruditæ coronamentum non semel de-  
 messuisti virtutis. (q) Sexaginta sex Viris cum Artistarum  
 Facul-

(o) Iterum 3tio ad Dignitatem Decanalem evedtus, quod quidem per paucis accidit.

(p) Cursum Vladislavianum integro biennio, vice altera extradidit.

(q) ad primam Lauream 22. Juvenes promovit ter, quā Decanus; bis ad Magi-  
 sterii gradum 44. Viros.



Facultatem auxisses, quibûs Laureis novos pluries ad id delectus Promotor ornâsti Philosophos, illæ amplissimis Tuis meritis, laboribus, & virtuti in pulcherrimam gloriæ cessere Coronam.

Atquè hæc sunt certè maxima (communi loquor omnium bonorum sensu) eruditæ Tuæ virtutis argumenta **PERILLUSTRIS DOMINE NEO-DOCTOR**, quæ per quinque integra in Statione Academica lustra, eò Te dignitatis provexere; ut nemo mortalium esto invidiâ rumpatur, ire inficias queat, quin Tibi satîs ad celebritatem famæ, satîs ad Nominis commendationem, perpetuamve memoriam cumulatissimè sufficere possint: ast dum illos tacitus mecum recogito, quos Tu Theologus exantlaveris labores, quos profuderis sudores, quas superâris difficultates, quos deniquè conatus subieris; ingenuè fateri cogor, posteriora prioribûs tantò ampliori digna fore elogio, quantò majori intervallò Divinarum rerum contemplationem, humanæ anteferri scientiæ, in confesso habemus. Quis enim est? qui sive in evolvendis Mysteriorum Fidei arcanis sive in demonstranda vi & efficacia Sacramentorum, sive in explicanda quantùm humanum fert ingenium, incomprehensibili illa, atquè à cognitione nostra remotissima DEI Essentia, & infinitis Ejus exponendis Attributis, Relationibus, Processionibus, sive in regulandis humanis actibus, & instituenda vitæ Christianæ ratione, Cælestem quandam Tibi mentem residere contendat? qui cùm isthæc omnia, quæcunquè aut in *Theologia Speculativa*, cùm altitudine sua captum excedunt, tum abyssali profunditate velut ingens pelagus cogitationes hominum absorbent, feliciter attigeris, atquè faciliter penetrâris: aut quidquid in *Sacramentali*, Divinis involutum



Myſteriis, velatum ſignis, arcanum effectibus, ab oculis  
 alienum, plane aperueris, & velut ad ſenſum demonſ-  
 ſtraris: aut quidquid demum in *Morali*, dubium, ambi-  
 guum, ſcrupuloſum, resolveris ſolidè, enucleaveris ad-  
 per te; pateticeis exhibes documentis eam Tibi animo  
 ſublimitatem inefſe, eam ingenio ſubtilitatem conveni-  
 re, eam doctrinæ claritatem competere, quâ nobilior  
 vel præſtantior nedum haberi, ſed vix quidem exoptari  
 poteſt. Norunt vaſtiſſimam mentis Tuæ capacitem, q-  
 quâ omnes Doctorum ſenſus circumferre videris, qui  
 cunque Te docentem ex Cathedra audierunt Profeſſo-  
 rem, quicunque domi & foris res circa Divinas acri-  
 ter ſolidèquè diſceptantem mirabantur Theologum, (r)  
 novimus inquam Academici, habent ſumma exiſtima-  
 tione Sacræ Religioſorum Ordinum Familiæ, & qui-  
 bus vel eruditionis Tuæ haurire perfectionem, vel à  
 longè ſaltem famam Nominis Tui venerari conceſſum,  
 omnes ij omnino maximas Tibi partes deferunt, & pri-  
 mum inter Sapientiſſimos noſtræ ætatis Viros locum faci-  
 lè concedunt. Exhausti totam Aquinatici Maris abys-  
 ſum; ut illam per rivulos in ſtudioſas diffunderes mentes,  
 abſorpfisti omnem Thomiſtici Solis plenitudinem; ut eam  
 per radios in auditorum diſpargerès animos, integram  
 Angelici Doctoris Summam intra ærarium aurei Tui  
 Capitis recondiſti; ut ſingulas eòuſquè diſpenſares per  
 partes, donec extradidiſſes per omnes. Trià propè  
 per luſtra Sacra in Facultate Profeſſor, (s) omnes Theo-  
 logicos perluiſtati & illuſtati Tractatus, Sacramenta-

(r) In omnibus ferè Religioſorum Ordinum Conventibus; tam intra, quàm  
 extra Urbem, frequentiffimè expoſitas Theſes invitatus oppugnabat.

(s) Anno Domini 1746. poſtquam ad Sacram Facultatem acceſſerit, præter  
 id quod pluribus annis Hiſtoriam Eccleſiaſticam à Nativitate Chriſti prælegeret; Cur-  
 ſus, Sacramentalem, Moralem, Speculativum numeroſiſſimo Auditori extradidit.



lem, *Mordlem*, *Speculativum* emensus *Cursum*, nihil in hoc amplissimo tractu reliquisti intactum, superasti quæ erant ardua, elucidasti quæ obscura, patefecisti quæ abscondita, communi Orbis Literarii consensu, citra omnem assentationis colorem, omni numerò absolutus Theologus meritò habendus. Ecquis igitur tot tantosve tuos labores communi Rei Literariæ emolumento donatos satis dignè pensârit? ecquis maximis promeritis, non quàm amplissimos decernendos honores judicârit? ecquis Sacram, quam obtines Lauream, non ex æquo virtuti sudoribusquè tuis deberi, ausit inficiari?

(r) Nequè verò Theologicum isthunc honorem ita promereri voluisti, ut laudatissima tua opera, domesticos duntaxat angulos adimplerent: superavit has angustias celeberrima Tui Nominis fama, & ad extra protracta in gloriosis publico donatis perennat factis. Parum alias es arbitratus, Academico tantùm allucere luco, nisi clarissimum virtutis tuæ lumen foris etiam illustrissimos suos radios propageret: ita enim Te Cathedris devovisti; ut dexteritas tua ad alia quoquè tractanda negotia, atquè munera par obeunda foret. Ad Generalia Regni Varsoviensia Comitia, Universitatis votò vice gemina LEGATUS electus, (t) quanta prudentiâ & consiliò onerosam illam gereres provinciam, quanta virtute sustineres, ille noverit satis, cui judicii maturitas, rerum administrandarum ratio, & lucidissima illa animi tui lucerna probè perspecta habetur. Succedebant ad vota secundè res nostræ Academicæ, pro quibus apud Illustrissimos Regni Ordines sollicitus instabas, stabat

G2

firmiter

(t) *Ad Comitia Regni Varsoviensia in negotio Universitatis bis electus Legatus.*



firmiter suo in cardine negotiorum Universitatis moles,  
 quam consiliò tuo, oratione, prudentiâ, sustinebas. Fuit  
 Tibi magnopere laboratum; honorem & gloriam Gentis  
 Togatæ suo in flore retinere, jura & libertates Rei Lite-  
 rariæ salva & illæsa conservare, corda & favores Proce-  
 rum promereri, & in partes Almæ Matris pertrahere, &  
 quidquid seu studiorum incrementum, seu bonum no-  
 men & famam Academiæ attinet, omni cura, sollicitudi-  
 ne & conatu promoverè, evincere, atq; fortiter propu-  
 gnare. Perspexit in Te isthanc rebus in agendis dexte-  
 ritatem, & quod maximum est, purissimum vitæ exem-  
 plaris candorem, atq; intaminatam morum integritatem,  
 CELSISSIMUS olim ILLUSTRISSIMUS & REVE-  
 RENDISSIMUS DOMINUS, STANISLAUS KOSTKA  
*in Załuskie* ZALUSKI, EPISCOPUS CRACOVIENSIS,  
 DUX SEVERIÆ, EQUES AQUILÆ ALBÆ, *Universi-*  
*tatis Cracoviensis Faventissimus & Liberalissimus* CANCELLA-  
 RIUS, *Præsul, Princeps & Senator* nullo ævò satîs dolendus,  
 qui cùm Clero suo Dioecesano ut vigilantissimus Pa-  
 stor, & Ecclesiæ commodi zelantissimus amator, vellet  
 providere, quò ampliora in Sapientia & Religione ca-  
 peret incrementa: Seminario Episcopali-Diacesano  
 summa sua liberalitate fundato, tuis verò curîs, vigiliis,  
 consiliò & prudentiâ erecto, non alium, nisi Temet-  
 ipsum, Virum aliàs sanctum & sapientem in Præfectum  
 & Provisorum constituit. (u) Quod grave munus, ex  
 quo pendeat Ecclesiæ dignitas, & Dioecesis totius emo-  
 lumentum, ut in partes tuas magna suscepisti virtute; ita  
 adusquè laudabiliter perficis Divina quadam felicitate.

Omnes

(u) *Annò Dòmini 1749. liberalitate Andreæ Załuski Episcopi Cracovi-*  
*ensis, resuscitato Seminario Academico-Diacesano in Præfectum & Provisorum con-*  
*stitutus.*



Omnes verò eò cogitationes defixas tenes, omnia studia dirigis, omnes conatus, nihil vitæ, nihil sanitati parcens impendis; ut Gregi Dominico, quem sibi Deus in hæreditatem suam eo in loco secrevisset & aleret: exemplò præsis, integritate & innocentia præluceas. Quorum Tu tam in Literis quàm in virtute laudabiles & pulcherrimas progressionès, tantidem, quanti vitam propriam, & fidem Deo datam faciens: nihil omittis, nihil non tentas, quod aut ad instituendos eorum animos, aut ad recti regulas componendos conferre possit. Quò verò feliciùs in virtute & Christiana Sapientia proficerent, iisdem nedum *Exercitium Compositionis Spiritualis*, Meditationes inquam Hebdomadarias, Fundatoris ZALUSCII Nomini inscriptas, anagogicis respersas actibùs, (x) sed etiam sanctas & salutare leges præscripsisti: (y) quomodò rectè honestèquè viverent, statutis sanxisti, quomodò mores vitamquè formarent, consiliò, præceptò, exemplò sufficientissimè informas. Nihil dico; quâ esses ad honestatem eorum cautione: quâ in docendo sollicitudine & attentione: quàm accurata & continua, ut unumquemquè de integro interpolares, vigilantia: cùm fidelissimè & gravissimè moneas, quid eos sequi, unde abhorre, ut in offenso vitæ cursu ætatem suam decurrant, oporteret. Ex quo consecutum est; ut insignem ex tali institutione Diœcesis tota perciperet fructum: nam quicquid ex ea proficiscuntur disciplina, quasi exempla quædam Sacerdotalis dignitatis inter homines versantur. Etenim in sermonibus & operibus tuis in-

H

teger-

(x) *Anno proxime sequenti 1750. Exercitium Compositionis Spiritualis, sive Meditationes Hebdomadarias, ad usum Seminarii, luci publicæ donatas Zalusciano Nomini inscripsit.*

(y) *Leges & Statuta Seminarii compilavit, idemquè in debitum ordinem prudentissimè redegit.*



tegerimis, quasi in Libro originali, jam ante legerant:  
quomodo eos cum Deo ambulare, & cum hominibus  
vivere oporteret. Spectat hæc pulcherrima & maxi-  
ma Ecclesiæ incrementa CELSISSIMUS PRINCEPS,  
ILLUSTRISSIMUS EXCELLENTISSIMUS & REVE-  
RENDISSIMUS DOMINUS CAJETANUS SOLTYK,  
EPISCOPUS CRACOVENSIS, DUX SEVERIÆ,  
EQUES AQUILÆ ALBÆ, *Universitatis Cracoviensis Fa-*  
*centissimus* CANCELLARIUS, feliciter modernus: nec  
finè ingenti animi voluptate, atquè singulari interna  
dulcedine eadem intuetur; unde cum majora in dies  
Diocesis sua ex idoneis ad usus Ecclesiæ Viris, in Re-  
ligione percipit incrementa: pientissimam *Antecessoris*  
*sui* foundationem, ut amplissimis favoribus atquè speci-  
alibus benevolentiae testimoniis prosequitur; ita sum-  
ma nobilissimarum dotum tuarum, & probatae virtutis  
æstimatione tenetur.

Nequè verò isthæc est meritorum tuorum de Ec-  
clesia mensura, crescunt illa continuò, donec ad sum-  
mum gradum provehantur. Equidem si Tu *Synodalis*  
*Ordinandorum & Approbandorum Examiner*, doctos Eccle-  
siæ Mystas, & gnaros conscientiarum Judices, magna  
circumspectione, nec minori judiciò provideas; (in quo  
quidem totius Religionis vertitur cardo) si ignaros  
& ignavos Pastores ab Ovili Christi arceas, vel ad sa-  
niores salutarè adhortamentò mentem reducas: utro-  
biquè ingens in Ecclesiam emolumentum, atquè ma-  
xima commoda derivantur. Quid verò dicam de Pa-  
storali circa Ecclesias Regimini tuo concredita cura,  
& sollicitudine? recognoscunt Te laboriosissimum Vi-  
neæ Domini operarium: Christi ovilia zelantissimum  
& pervigilem Pastorem ultro fatentur: prædicant Dei

&

&  
vic  
par  
des  
tur  
fusi  
tio  
isth  
len  
om  
not  
ber  
Mu  
do  
De  
ex  
Eju  
nib  
reti  
gnâ  
nun  
tan  
bun  
ore  
Dei  
ri.  
gine  
Ada  
dei  
-IV  
mun  
(  
Ossero  
sermon



& Tuæ Sponsæ, nedum amantissimum, sed etiam providum & munificum Sponsum: clamant templorum parietes pietatem tuam, loquuntur de parietibus lapides, quos liberalitate tua in Superos animâsti, testantur munificentiam splendida Divorum tecta, quæ profusissimis tuis impensis, renovâsti, restaurâsti, tum pretiosa suppellectili ditâsti & ornâsti. Recenserem ego isthæc singula; ni innata tua modestia altum calamo silentium imponeret: quippe liberalitatis tuæ virtutem, omnino coram hominibus celatam, soliquè duntaxat notam & manifestam Cælo placet Tibi haberi: potius bene de Deo mereri, quàm vanæ gloriæ tubâ coram Mundo decantari exoptans. Quantum Divino augendo cultui, intentus? quantum Immaculatè Conceptæ Deiparæ Virginis honori propagando sis deditus? vel ex continuatis plurimos per annos, sacris in laudem Ejus à Te ad frequentissimum Auditorem habitis sermonibus, quibûs Originalem Divinæ Matris, contra hæreticorum calumnias & errores vindicâsti & propugnâsti innocentiam, (z) manifestè liquet. Audiebat numerosissimus populus non tanquam ab homine, sed tanquam ab Angelo, dicam potius tanquam à Deo verbum Ejus, quod velut gladius parte utraqûè acutus de ore tuo procedebat, quò injuriosas Dignitati Virginis Deiparæ hæreses, in victimam Mariano mactabas honori. Quo verò affectu, quo labore, quo studio, pro Virginea puritate decertares, quàm solidè non peccâsse in Adam Mariam deduceres, quàm strenuè contraria Fidei Catholicæ dogmata expugnares, quis dicet?

H<sub>2</sub>

Ita

(z) In Conventu Paxensi Fratrum Minorum Ordinis S. Francisci antiquæ Observantiæ, solennem Immaculatæ Conceptionis Octavam, plusquam per duo lustra, sermone Concionatorio concludebat.



Ita publicis Ecclesiæ distentis curis, integer tamen providendis *Juventutis Academicæ* commodis superfueras, quæ ut ad feliciter tractandas sublimiorum Facultatum Scientias facilius institueretur: **LOGICAM INCIPIENTIUM**, diligenti Tua operâ collectam, & in lucem evulgatam, illius usibus donasti. (aa) Nam cum isthæc mediante calamo prius in paginas, antequam in animos influeret, omniq; semestri mutaretur, scribentium manus fatigando, temporis jacturam faciebat, quod explicandis Dialectices præceptis aptius impenderetur: suscepisti id laboris in tuas partes, eaque methodo Logicales regulas in debitum & accuratum ordinem redegisti; ut captui uniuscujusquæ summa claritate accommodatæ, studiosas mentes ad faciliorem Philosophiæ Peripatheticæ cognitionem formarent. Eam verò doctissimam animi Tui lucubrationem, non aliter in publicum prodire voluisti; nisi fortunatissimis sub auspiciis *Illustrissimi ac Excellentissimi Domini D. ADAMI in Zakliczyn JORDAN, Palatinidæ Bractaviensis, Generalis Leytnant Exercituum Regni*. Viri ut aliàs vetustate Profapiæ, summa Majorum authoritate, colligato cum Principibus Nominibus sanguinis nexu, maximis de Serenissima Majestate & Republica Polona promeritis commendatissimi: ita de Literis & Literatis meritissimi, Universitatis verò nostræ Cracoviensis, Amplissimi Patroni & Protectoris. *Domus hæc Illustrissima meritò Asylum honoris Academici* dicenda: quæ sicut Jagellonicis Musis studiosissimè patrocinatur; ita eas specialibus benevolentiae testimoniis cumu-

(aa) Logicam Incipientium pro *Schola Dialectica in Collegio Novodvorsiano accommodatam, Nominis & honori Illustrissimi & Excellentissimi D. Adam in Zakliczyn Jordan inscriptam, Anno Domini 1753. in lucem edidit.*



cumulatissimè afficere contendit. Quàm multis titulis  
Magno Nomini JORDANORUM obstrictus maneat;  
ex publicis superabundantis affectus, quò Te effusissimè  
prosequuntur argumentis modum & mensuram desu-  
mo. Faxint itaque ( commune Academicorum vo-  
tum ) boni Superi ! ut in *Illustrissima sua Domo* fasces &  
purpuræ, conitanti cum fortuna æternùm perennent.  
Quantum verò nedum Juventuti emolumentum, sed &  
ingens Peripatho gloria non accessit ex nobilissimo  
hoc mentis tuæ partu ? dum Aristotelicæ doctrinæ ve-  
ritatem, utilitatem & præstantiam in Apologia pro ar-  
te disputandi Peripatheticorum, contra modernos no-  
vatores solidis rationibus deduceres: triumphavit hic  
honos Peripathi, æmulorum verò invidia livore tabe-  
scens consumebatur. Nec satis ei erat internis cruciati-  
bùs torqueri, nisi malis artibus clanculum confecta  
convicia, ubi argumenta non suppeterent, in publicum  
effutisset. (bb) Eruperat inopinatò ab insolenti homine,  
& magno novitatum amatore *Carpophoro* ( nescio quo  
mimico & gesticulatore ) conviciorum ex trivio lecto-  
rum petulantia, Peripatheticæ doctrinæ, tuæquè solidæ  
eruditioni plurimùm injuriosa; vindicârunt integerri-  
mum honorem tuum nescium periclitari, à Zoili te-  
meritate, Aristotelicam autem veritatem, strenuè pro-  
pugnârunt publicis scriptis DISCIPULUS & AMI-  
CUS: (cc) retorserunt in caput Authoris tela, inci-  
ditquè in foveam quam fecit. Domi rebùs feliciter  
I confectis

(bb) *Annò Domini 1755. prodiit famosus libellus contra Authorem Apologiæ  
pro arte disputandi Peripatheticorum, sub ficto nomine Carpopphori Philaethæ,  
sub data Verona.*

(cc) *Eodem anno, erudito scriptò Discipulus & Amicus, convicia Carpo-  
phori refutarunt.*



confectis, longè latèquè per utramquè Poloniam & Prussiam jacentibus Academicis revisendis, quà *Visitator* electus, es admotus Coloniis: (dd) Culmenſe Gymnaſium aucto majori (liberalitate Civitatis) Profeſſorum numerò & ſtipendiò, in Academiam reformàſti, labore, diligentia, & prudentia tua plantàſti, eidemq; certas leges & ſtatuta, quæ ſeu Juventutis ſtudiorum curſum, ſeu optimum Academiae regimen ſpectarent, providiſti: ubiquè de profectu in Literis & honeſtate ſtudioſorum ſeriò inquirens, juvenes ad ingenuas artes & virtutes, Profeſſores ad conſtantem & indefeſſum laborem, Paternè hortabaris & invitabas.

Hi ſunt itaquè Academici Tui hercle maximi labores, quibûs velut ſolidiſſimo virtutis tuæ innutritus alimentò, ad venerandum uſquè creviſti ſenium: hæc pulcherrima tuorum meritorum fama, quæ Nomini tuo immortalitatem parat: hæc apertiſſima Sapientiæ, tuæq; probitatis argumenta, quæ Sacram Theologicam, quam recipis Lauream, non Tibi è facili veniſſe jugo, manifeſtè evincunt. Probavit id publico testimoniò, Vir permagnæ Authoritatis, decus & columen Orbis Literarii, feliciffimus Sceptrorum Academicorum Moderator, Jurium & Libertatum Univerſitatis Vindex & Aſſertor, *Magnificus Perilluſtris & Reverendiſſimus Dominus, D. M. STANISLAUS MAMCZYNSKI, J. U. Doct̃or & Profeſſor, Ejusdemquè Facultatis Decanus, Eccleſiarum Cathedralis Cracoviens̃s Canonicus, Parochialis in Smarzowice Curatus, Collegii Juridici Senior Pater, Conſiſtorii Cracoviens̃s Judex Surrogatus, Contubernii Jurisperitorum Proviſor, Canonizationis B. Joannis Cantii Procurator, Librorum per Diœceſim Cracoviens̃em Cenſor, Studii Generalis Univerſitatis Cracoviens̃is, Procancellarius* & Gene-

(dd) *Annò Domini 1756. in Viſitatorem Coloniæ electus.*



19

& Generalis RECTOR, qui cū nuper, ad obtinen-  
 dam Sacram Lauream publicè Tibi Licentiam defer-  
 ret; ex expositis de MYSTERIO SS. TRINITATIS the-  
 sis, solenni argumentō applaudens, *Mysterium Te laborum*  
*Academicorum* in facie Universitatis pronuntiavit: paucis  
 quidem verbis constans elogium, sed quod grandiores  
 Panegyres absolvere posset. Pari meritorum tuorum æsti-  
 matione tenetur, Vir, ut gravi senio per omnia veneran-  
 dus; ita diebus suis certè maximus, quō nemo major in  
 Academia surrexit, *Perillustris Clarissimus & Admodum Reve-*  
*rendus Dominus D. M. STANISLAUS PHILLIPPOWIC,*  
*Sacrae Theologiae Doctor & Professor, Universitatis & Collegii Ma-*  
*joris Senior Pater, Ecclesiarum Collegiatarum S. Floriani Clepar-*  
*diae ad Cracoviam Decanus, Cureloviensis Scholasticus, Parochia-*  
*lium Premykoviensis Praepositus, in Igotomia Curatus, Contuber-*  
*nii Hierosolymitani & Alumnatus Roszcevianni Aestimatus Pre-*  
*visor,* qui cū à primo vitæ tuæ Academicæ diluculo  
 Tibi semper intimus foret, quantum de exoptata hac  
 Theologici Honoris virtuti Tuæ pridem debiti accessi,  
 one congauderet; plenis affectus verbis est contesta-  
 tus: sūt LaVs honor, & gLorla LICentianDo. aMen-  
 Gaudent etiam atquē lætantur, summaquē perfruuntur.  
 nunc voluptate, jam ad beatam translati immortalitatem,  
 clarissima olim Academiae lumina, SZYMAKOVIVS,  
 POPIOLEK, HERKONES, quibus Tu ut superstitibus  
 eras carissimus; ita post fata fidelissimus supremæ vo-  
 luntatis Executor, recentem eorum ad Divorum Aras  
 memoriam circumfers: dum Te Sacra in praesentiarum  
 coronari Cydari, ex Siderea illa arce prospectant, quam  
 Tibi in vita medullitus exoptabant.

Sed quorsum calame? æquum ne PERILLUSTRIS  
 DOMINE NEO-DOCTOR, angustis paginae margini-



bûs laudum tuarum Oceanum arctari? fas ne hebescenti  
pennæ, elogiorum tuorum magnitudinem intra Orato-  
riam circumductionem terminare? crescant hæc plus  
ultra; & ad amplissima gloriæ incrementa assurgant.  
Jam igitur doctam frontem, Sacris quæ se in eam de-  
mittunt, submitte fertis, hæc utiquè in tuis sudoribus  
crevere: dignissimis recipe de manibus, *Perillustris &*  
*Reverendissimi Domini D. M. ADALBERTI GRZYMAŁA,*  
*Sacræ Theologiæ Doctoris & Professoris, ejusdemquè Facultatis*  
*Decani, Cathedralis Cracoviensis Canonici &c. Promotoris Æsti-*  
*matissimi, Viri, genere, sapientiâ, virtute, meritîs Clarissi-*  
*mi, pulcherrima Theologica isthæc, quæ Tibi insignia*  
*defert, & superatis Virtutis Ædibûs per Gentilitiam sui*  
*Portam Theologici Honoris Capitolium gloriosus Tri-*  
*umphator subintra. Cingit Te Illustrissima Amplissimo-*  
*rum Hospitum, Prælatorum, Canonikorum, Corona,*  
*assistent Sacri Religiosorum Ordinum Cætus, ut hodi-*  
*ernæ festivitati plus splendoris plausûsve adveniat, &*  
*Sacræ Dignitatis accessionem tuis meritis conferri, so-*  
*lennissimè gratulantur. Ambit Te frequentissimus Aca-*  
*demicus Senatus, congregati Universitatis Ordines, to-*  
*taquè Gens Togata Sceptribus decorata suis, honori ap-*  
*plaudendo tuo, propriis Te manibûs in Sedem Docto-*  
*ralem deportat. Nobilissima etiam Jagellonica Juven-*  
*tus, Æstimatissimo suo PROVISORI, jubilans & gesti-*  
*ens, lætos applausus & festas ingeminat voces. Hoc*  
*est unanime quorumvis bonorum votum, hæc una vox*  
*Tibi adictissimorum: ut, dum hodie Virtutem, Sapienti-*  
*am, meritaquè Tua, Sacra Doctoralis præmiat Corona,*  
*florentissimis Te honoribûs, atquè secundo vitæ finè*  
*ulla offensione cursu, longævum & incolumem,*  
*Boni Superi coronent.*



XX. 28



i  
r  
s  
c.  
e-  
s  
3  
a,  
is  
i-  
fi-  
ia  
ui  
i-  
o-  
a,  
li-  
&  
o-  
ca-  
o-  
p-  
o-  
en-  
ti-  
oc  
ox  
nti-  
na,  
inè

Biblioteka Jagiellońska



stdr0011406



